

“Tursimo Ayera, Awe y Mañan”

Minister Oduber a bautiza buki di pionero di turismo Rory Arends



DIAHUEBS anochi Minister di Tursimo, Otmar Oduber tabata e invitado di honor durante e lansamento di buki di un pionero den turismo, Rory Arends. Minister Oduber a haya un caluroso bon bini di parti di varios di e pioneronan den turismo cu tabata presente durante e bunita ocasion aki.

E ceremonia a cuminsa cu un bunita speech di Abigail Arends, yiu muher di Rory Arends unda cu el a conta e storia completo di con e iniciativa aki a cuminsa.

Siguientemente Rory Arends a splica un tiki di su buki cu ta duna un bista riba nos turismo

di antes, di awe y su pronostico di e turismo di futuro.

Sr. Arends a menciona cu el a skirbi e buki pa recorda tur hende e escencia di nos turismo y nos pida baranca y kier laga e buki aki atras pa futuro generacionnan.

Ta hopi importante pa por ilustra cu e buki aki di Turismo, Ayera, Awe y Mañan, ta papia hopi di e bon servicio cu Aruba ta brinda su bishitantenan, como tambe di e vision di e manera pa ehecuta Turismo den e epoca entrante cu ta refleha riba e vision di Minister Oduber. E palabranan di Rory Arends

tabata di elogio p'e mandatario di Turismo.

Siguientemente Minister Oduber como e padrino di buki conhuntamente cu Abigail Arends a bautiza e buki. E mandatario a elogia e trabou literario realiza pa Rory Arends, y a gradici'e pa su contribucion durante tanto aña pa cu turismo. Aki mester menciona cu keto bay sr. Arends ta sigui contribui cu nos turismo, banda di e skirbi e buki aki, tambe e ta forma parti di e Tourism Council cu Minister Otmar Oduber a lanta como organo consultativo pa cu maneho di turismo.